

**Date – 04/09/2025**

**Time - 18:30 Hrs**

### **HEADLINES ( EVENING )**

1. School Education Minister Dr Vanlalhlalan zirtirtu te ni puala a thuchahah state chhungah zirna ti hmasawn turin theihtawp an chhuah mek a ti.
2. Union Information and Broadcasting Minister Ashwini Vaishnaw in GST rate tihhniam hian mi naran te leh sum lalut tlem chhungkuate phurrit tam tak a chhawk ang a ti.
3. Union Health Minister JP Nadda chuan GST siamthat chuan damlo enkawl na healthcare man a ti hniam dawn a, mipui nun a tihmasawn dawn tih a sawi.
4. India leh Singapore te chuan vawiin khan thawhdunna tur inremna thuthlung panga an ziak.

<><><>

### **TEACHERS DAY MESSAGE**

School Education Minister Dr Vanlalhlana chuan zirtirtu te ni pualin zirtirtute chibai a buk a, state chhungah zirna ti hmasawn turin thawihtawp an chhuah mek a ni. Akashvani Aizawl kaltlanga nichin tlai dar 6.10 a Zirtirtute Ni puala a thuchahah Dr Vanlalhlana chuan Zirtirtu indaihlohna phuhruk turin theihtawp an chhuah a, an sorkar atangin, school education dept chuan casual teacher primary school 648, middle school 371, high school zirtirtu 350 leh Hr Sec School Lecturer 50 lak a ni tawh a ti a, primary school casual teacher 234 lakbelhna tur pawh buaipui mek a ni, a ti. Zirtirtu natna khirhkhan tuarte tanpuina tur National Foundation for Teachers Welfare fund a zirtirtute sum thawhkhawm atangin nikum sept thla atanga – kumin august thla thleng khan zirtirtu 153 hnenah cheng nuai 25 sing 6 tanpuina pekchhuah a ni a ti. Dr Vanlalhlana chuan kuminah National award dawng tur zirtirtu an awm lo tih sawiin, pawh a tih thu a sawi a, Mizoram sorkarin a mi 3 a rawt chungin kuminah dawng thei an awm lo a ti a, hei hi a chhan chu documentation uar tawh loh vang a ni a ti a, evidence, document leh thlalak thlenga vawn that anih thin loh avangin zirtirtu ten an phu tawh chawimawina an hmuh loh phah thin a, hemi kawngah hian tan lak thar a pawimawh ati.

Zirtirtute Ni, Teachers Day hi naktuk Sept ni 5 ah hman thin a ni a, kumina sorkar chawlh a nih avangin, remchan zawkna avangin school tamzawkah vawiin hian zirtirtute pual hun hman a ni. Zirtirtute Ni pual hian Mizoram Rural Bank chuan Mizorama sikul thlan bik 53 hnenah vawiin khan water cooler 27, computer set 21, printer 8, portable speaker 2, musical instrument 2, pedestal fan 5, smart TV 3 leh laptop 1 an pe a, a zavaiin cheng nuai 20 leh sing 7 man a ni. Mizoram Rural Bank hian CD Ratio zaa 65 a ni mek a; Education Loan hi mi 180 chuang hnenah pe tawhin, cheng vbc 5 chuang zet a ni tawh.

<><><>

### **FCA REACTIONS**

Zo Re-Unification Organisation (ZORO) chuan Mizoram sorkarin Forest Conservation (Amendment) Act, 2023 a pawm tâk chu Zo fate tana thil pawh tak a nih theih avangin an duh loh thu an sawi a; Central beng a thlen hma ngeia ngaihtuah tha tur leh a tul anga Special Assembly pawh koa ennawn leh turin Mizoram sorkar an ngen tih an sawi a, sorkarin a ngaihtuah tha lo a nih chuan a tawp thlenga hma lak an tum thu an sawi a ni.

Vawiin khan Aizawl Press Club-ah thuthar thehdarhtute kawmin, ZORO vice president L Ramdinliana Renthlei chuan Forest Conservation (Amendment) Act, 2023 (FCAA) hian sorkar laipui chu thuneihna sang tak a pek thu a sawi.

ZORO hruaitute chuan, FCAA hi Supreme Court pawhin a ngaihtuah lai mek a nih thu te, court pawhin thutlukna pawh a la siam theih loh lai leh line of control pawh an la sawifiah theih loh laia Mizoram sorkarin a lo pawm ngawt chu fel lo an tih thu te, thangthar lo awm zel turte hmakhua a tihchhiat theih thu leh Zo fate pawl sawina lian tak a nih thu an sawi a, FCAA 2023 hian fundamental right a bawhchhiat avangin Indian Constitution Article 13 sawi anga he Parliamentary Act hi tihtawp mai emaw, Indian Constitution-in dikna chanvo a pek anga her rem chi nia a lan thu an sawi.

MNF Party pawhin nimin khan Forest Conservation (Amendment) Act, 2023 adopt-na Resolution chu sut tura Mizoram Legislative Assembly Special Session koh rawtna Assembly Speaker hnenah an thlen a ni.

Nimin khan MNF National Core Committee leh Political Affairs Committee te, MNF Legislature Party te chuan Mizo Hnam Run ah Joint meeting neiin FCA chu ram leh hnam tana thil thalo leh Mizoram Central sorkar kuta Dan hmanga hlanna anih theih tlat avangin Assembly Special Session rang taka koh a, FCA 2023 adopt-na Resolution kha sut leh ngei an phut an ti a. India danpui hnuaia in humhimna dan Article 371G chu MNF leh India Sawrkar inremna rah chhuah liau liau a nih avang leh Hnam hnuk khawih a nih avangin, a bawhchhe zawnga chet lak chu an do tlat an ti.

<><><>

**MPCC**

Mizoram Pradesh Congress Committee (MPCC) chuan vawiin khan Aizawla Transport Directorate kawtah BJP sorkar hnuaia state thenkhat inthlanpuia vote tihchingpen (vote chori) duh loh lantir nan punkhawm an huaihawt a; Transport Directorate kawt atangin Congress Bhavan thleng electoral roll tihchingpen duh lohna lantir nan kawng an zawh a ni. Punkhawma thusawitu MPCC PAC member & adviser Pu John Siamkunga chuan, tunlaia India ramin a buaipui em em chu vote chori - vote in rûksak leh tihchingpen, hming lem hmanga e-roll a inthun, house number leh address tel loa e-roll a inthunte a nih thu a sawi.

Vote chori chu a tirah politics-a inpuhchhiatna niin mi tam takin ngai mah se, a tak tak a nih zia a lang chho mek tih sawiin Pu John Siamkunga chuan, Bihar inthlan neih turah pawh hian Intensive Electoral Roll Revision-ah thil dik lo tam tak a awm a ti a; Rahul Gandhi-a’n vote chori a buapui avang hian India ramah a dinhmun a kang chho zel a ni a ti.

<><><>

**AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

**GST HAILED**

Union Information and Broadcasting Minister Ashwini Vaishnaw chuan sawrkarin Goods and Services Tax (GST) rate tihhniam a rel chu lawmawm atih thu a sawi a. Vawiina Gurugram-a Sohna ah chanchinbumite kawmin Union Minister Vaishnaw chuan sawrkar thutlukna chuan mi naran middle class te leh sum lalut tlem chhungkuate phurrit tam tak a chhawk ang tih a sawi.

Industry lian tak takte pawhin sawrkarin GST rate a ti hniam chu lawmawm an tih thu sawiin awlsam zawka chhiah lak dan thar kalpui tur chuan sumdawnna pawh a ti awlsam dawn an ti a. Confederation of Indian

Industry-CII chuan zaa 5 leh zaa 18 chuan refund a ti awlsam dawn tih sawiin MSME kalphung pawh a tiawlsam dawn an ti a. Hei bakah hian Life leh Health Insurance a GST tihtlem a ni chu kalphung thar pawimawh tak a ni an ti bawh.

Association of Indian Medical Device Industry Forum Coordinator Rajiv Nath chuan sawrkar thutluknaah an lawm hle tih sawiin damlo enkawlna man tlawm mipuiten an dawng thei dawn tih a sawi.

PHDCCI President Hemant Jain pawhin hunpui lo thleng tur thlirin tuna sawrkar thutlukna chu a pawimawh a tih thu a sawi.

Federation of Indian Chambers of Commerce and Industry pawhin hetiangaw sawrkarin thutlukna a siam hian indirect tax lakkhawm kawngah hmasawna a awmchhoh hret hret zia a tilang a tibawh.

Govt Aizawl College, Commerce Dept-a Asst Professor Dr. Vanlalmuana chuan GST thar hian Mizoramah nghawng a nei nghal dawn tih sawiin, nitin mamawh ei leh in man a tlawm bakah, sumdawngte tan pawh chhiah pek a awlsam sawt dawn bawh a ni a ti.

<><><>

**GST COUNCIL MEETING**

Union Health Minister JP Nadda chuan GST siamthat chuan damlo enkawlna healthcare man a ti hniam dawn a, mipui nun a tihmasawn dawn tih a sawi. Vawiina Social Media-a a thu dahah Pu Nadda chuan sawrkarin mi rethei leh mi narante a ngaih pawimawh zia a lang leh ta a ti a. Mihring nun chhan nana hman thin damdawi chi 36 ah GST lak a ni tawh lo turte leh health leh life insurance ah chhiah tihtlem a ni chu a lawmawm atih thu a sawi a. Damdawi thengkhat leh damdawi bungrua leh inenkawlna hmanraw thenkhata GST tihtlem chuan mitin tan damlo enkawlna man tlawm zawk a pe thei dawn a ni a ti bawh.

Puan tawh angina nimina GST Council thukhawm chuan GST a lakna thenkhat a tihnim a. He GST rate thar hi tun thla ni 22 atanga hman tan tur a ni.

Union Finance Minister Nirmala Sitharaman chuan chanchinbumite hmaah GST lak dan thar chungchang sawiin mi naran leh middle class te nitin mamawh leinaah zaa 18 emaw zaa 12 emaw zaa 5 emawa tihhniam an rel a ti a.

GST tihhniam langsar zingah car te chi ho leh lirthei ke hnih nei 350cc chin ah GST zaa 28 lak thin chu zaa 18 a tihhniam a ni a. Bus, truck leh ambulance ah te zaa 28 atangin zaa 18 ah tihhniam a ni bawh a. Auto part zawng zawngah zaa 18 lak a ni ang a. Three wheeler ah zaa 28 atangin zaa 18 ah tlakhniam a ni.

<><><>

**INDIA-SINGAPORE**

India leh Singapore te chuan vawiin khan thawhdunna tur inremn thuthlung panga an zia. Heng an inremna te hi Civial Aviation, Space, Skill Development, Digital asset innovation leh Gren and Digital Shipping corridore ah te a ni a. Prime Minister Narendra Modia leh Singapore PM Lawrence Wong te New Delhia an inkawm hnuah heng inremna hi ziah a ni.

<><><>